

Աղէքսանդրապօլցի բարեպաշտուհի տիկին Տիրուհի Պետրոսեան և իւր որդի Պ. Արտաշէս Բարսամեանց ձեռամբ բարեկամ Մեսրոպը քահանայի Գիւլումեանց նուիրել են 50 բուբլի տեղւոյն Սահականուշեան օրիորդաց դպրոցին, խնդրելով որ ամէն տարի Վարդանանց տօնին հոգեհանգիստ կատարուի ի յիշատակ հանգուցեալ Վարշամայ Բարսամեանց: Գովուլթեան արժանի է սոցա այս բարեպաշտական գործը:

ԴԱՏԱՍՏԱՆԱԿԱՆ

ՔԱՂՈՒԱԾՔ.

Յունիս 1. Ս. Սինօդ հիմնուելով Վրաստանի և Իմերեթի Կոնսիստորիայի յայտարարութեան վերայ ընդ համարաւ 2039 ի 18 Մայիսի, հրամանագրեց նմին, Տփիսիոյ Գնունի Գէորգ քահանայի անվայել գործոց համար ենթարկել նորան երեքամսեայ ապաշխարանաց ի վանս Հաղբատայ ի խրատ և ի զգուշութիւն այլոց քահանայից:

Յունիս 3. Ս. Սինօդն լսելով Շամախուոյ առաջնորդ Գեր. Մեսրոպը Արքեպիսկոպոսի Սմբատեանց յայտարարութիւնը ընդ համարաւ 145 ի 20 Ապրիլի տարւոյս, յայտնեց նորան թէ, ի դէպս թաղման անձնասպանից, պէտքէ օրինական համարել բժըշկաց վկայականներն հոգեկան հիւանդութեանց համար, որով կապացուցանեն թէ, անձնասպանութիւնն յառաջացել է յանգձայութեանց կամ ի խելագարութեանց, և նոյն վկայութեան հիման վերայ թաղել ինքնասպաններն, բայց ոչ հանդիսաւոր յուղարկաւորութեամբ կամ խմբով հոգեւորականաց, այլ մի միայն ծխատէր քահանայի ձեռօք:

Յունիս 22. Ս. Սինօդն հիմնուելով Վաղարշապատու գործակալ Գրիգոր քահանայի Տ. Գրիգորեան յայտարարութեան վերայ ընդ համարաւ 66 ի 27 Ապրիլի, հրամանագրեց նոյն գործակալին թոյլ տալ ներքին Խաթունարիս գիւղի եկեղեցւոյ շինութեան համար ընտրուած հողաբարձութեան նորոգել նոյն գիւղի Ս. Նշան եկեղեցին իւր սեպհական արդիւնքով և ժողովրդոց օժանդակութեամբ: